



## **IZVJEŠTAJ O RADU UPRAVNOG ODBORA SAMOSTALNOG SINDIKATA RADNIKA u BHRT-u ZA 2018. GODINU**

UO SSR u BHRT-u je u 2018-toj godini održao 12 redovnih i 3 vanredne sjednice. Ukupan broj izostanaka članova Upravnog odbora sa sjednica je 55, od toga 43 opravdanih i 12 neopravdanih.

Sindikata je tradicionalno organizovao prigodan ispraćaj u penziju za članove SSR u BHRT-u, koji su penzionisani zaključno sa 31.12.2017. godine. U tu svrhu je izdvojeno 1300 KM.

UO Sindikata je početkom godine utvrdio zahtjeve Sindikata prema menadžmentu, a to su: plan isplata bruto plata sa doprinosima, način rješavanja zaostataka za sve doprinose koja se duguju radnicima, Sistematizacija, produženje ugovora sa EP, upit za reportažna kola, vozni park i nabavka vozila/kombija, kao i da se izmjene zakona o radu iz decembra 2017. godine primjene pri izradi rješenja za nove godišnje odmore.

Sindikata je tražio informaciju u vezi najmanjih plata i minulog rada i dobio odgovor od menadžmenta : “U postojećim opštim aktima BHRT-a ne postoji pravni osnov za pozitivno rješavanje korekcije plaća zaposlenih u Odsjeku za zanatsko higijensko održavanje Sektora Upravljanje imovinom i investicijama. Prilikom buduće izrade izmjene opštih akata ovoj problematici će biti posvećena dužna pažnja.”

U februaru mjesecu održan je sastanak sa Ministrom komunikacija i prometa BiH Ismirom Juskom na kojem se razgovaralo o Zakonu o javnom RTV sistemu, problemu stabilnog finansiranja javnih servisa i procesu digitalizacije. Prijedlog Sindikata u vezi s izmjenom Zakona tiče se izmjena definicije RTV takse koja predstavlja problem pri utuženju, odnosno kada RTV servisi žele naplatiti RTV taksu u sudskom procesu, zatim formiranja zajedničke službe za naplatu RTV takse, kao i planiranja sredstava u budžetu BiH za vraćanje duga Evropskoj radiodifuznoj uniji. Također je istaknut problem nedostatka HD reportažnih kola, bez kojih BHRT ne može završiti proces digitalizacije. Ministar Jusko je obećao da će pokušati naći rješenje za ovaj problem i zamolio da se ministarstvu dostavi specifikacija na engleskom jeziku. Sindikata je u najkraćem roku o ovome obavijestio menadžment BHRT-a.

Na osnovu člana 8 Statuta Samostalnog sindikata radnika u BHRT-u, UO Samostalnog sindikata radnika u BHRT-u je donio odluku da se svakoj članici SSR u BHRT-u za 8. mart dodijeli bon u vrijednosti 30 KM.

Sindikata se ogradio od pojedinih imenovanja na odgovorna mjesta u BHRT-u, koja je izvršio Upravni odbor BHRT-a, bez obzira na to da li su te odluke donesene jednoglasno ili ne, smatrajući da pojedine osobe koje je imenovao UO BHRT-a, ne mogu svojim etičkim kvalitetama zadovoljiti odredbe Kodeksa o audiovizuelnim medijskim uslugama i medijskim uslugama radija, koje je donijelo Vijeće RAK-a, 17.12. 2015, kao ni odredbe Uređivačkih načela JRTV Sistema BiH donesenih 09. 04. 2003.godine.

Zbog svega navedenog Sindikata je zatražio od menadžmenta donošenje Kodeksa ponašanja uposlenika, kako se takvim istupima ne bi daljnje urušavao ugled BHRT-a.

10. aprila 2018.godine je delegacija Samostalnog sindikata radnika u BHRT-u položila cvijeće na spomen ploču ubijenim radnicima u prizemlju RTV Doma.

Upravni odbor Samostalnog sindikata radnika u BHRT-u je dobio prijedlog menadžmenta o izmjeni postojeće sistematizacije i jednoglasno donio odluku da smatra neprihvatljivim uvođenjem novog radnog mjesta Urednik specijalnih projekata u postojećoj sistematizaciji, a naročito ako se u obzir uzme da je u procesu izrada nove sistematizacije.

Upućen je upit u vezi problema između urednika IP-a i radnika IT Centara u skladu sa zahtjevom članova sindikata iz ITC-a.

Održan je tematski sastanak u vezi obračuna plata za vrijeme praznika na inicijativu sindikata. Osnovica sata se umanjuje odnosno povećava u odnosu na broj dana u tekućem mjesecu. Menadžment je istakao da će se ovaj problem morati riješiti u novoj sistematizaciji.

Samostalni sindikat radnika u BHRT-u je od menadžmenta BHRT-a tražio smjenu urednika IP-a BHT1, Marka Radoje zbog narušavanja ugleda BHRT-a i prekoračenja ovlasti, a povodom njegovih istupa u javnosti i neovlaštenih postupaka kada je u pitanju obilježavanje 11. jula.

Održan je sastanak u vezi problema na reportažnim kolima sa generalnim direktorom i pomoćnicom za razvoj. Iznijeti su slijedeći problemi: oboljenja koja su posljedica rada u BHRT-u, napadi na ekipe na terenima, HTZ oprema, prevoz tj. Službena vozila, smještaj na terenu, problem prostora za ENG ekipe, napredovanje, problem putne akontacije na terenima, monitoring na reportažnim kolima za koji je sindikat već upozoravao menadžment i ACC za reportažna kola.

Dogovoreno je sa menadžmentom da se skrene pažnja producentima na odluku koja je donesena za rad na terenu i da su producenti, kao odgovorne osobe dužne da povuku ekipu u slučaju opasnosti i napada na ekipu. Kada je u pitanju HTZ oprema, menadžment će dostaviti sindikatu prijedlog nabavke opreme u raspoloživom finansijskom okviru. Što se tiče vozila, rečeno je da su nabavljene tri lade za PEP i da će se za rad na terenu, u slučaju potrebe, iznajmljivati vozila za prevoz ekipa.

Kada je u pitanju smještaj (jednokrevetne/dvokrevetne sobe), zaključeno je da se svi jednako tretiraju u situacijama kada je to moguće uraditi. Kako je rečeno na sastanku, ne bi trebao biti problem ACC za reportažna kola.

Upravni odbor Samostalnog sindikata radnika u BHRT-u je osudio napad na našu ekipu u Konjicu i zatražio od nadležnih organa da informiše javnost o istrazi dana 20.08.2018.godine. Od menadžmenta je zatraženo da se označe kombi vozila koja se iznajmljuju, da se napravi procedura povlačenja ekipe sa terena u skladu sa aktima BHRT-a u slučaju napada na naše radnike, kao i da se uputi dopis N/FS BiH u vezi sigurnosti radnika na terenu i BH Telkomu kao glavnom sponzoru Premijer lige.

Također SSR u BHRT-u je osudio napad na kolegu Vladimira Kovačevića, dopisnika BNTV iz Banjaluke.

Sindikat je 09.09.2018. godine organizovao sindikalni izlet na izletištu Ribnjak u Dejčićima kod Trnova za preko 100 svojih članova.

Iz Švicarske je, zaslugom SSR u BHRT-u, stigla donacija u opremi za BHRT.

Sindikata je dostavio menadžmentu analizu napredovanja koje su pripremile Podružnice SSR u BHRT-u. Od menadžmenta smo dobili informaciju da je tender za HTZ opremu koju je tražio sindikat odobren od UO BHRT-a, kao i da su stigle tri Lade Nive i da se u narednom periodu očekuje dolazak pet Opel kombi vozila.

Upravni odbor Sindikata je zatražio izmjene pravilnika o disciplinskom postupku i opštih pravila o radu i ponašanju, koja su i donesena na zahtjev Sindikata i uputio dopis UO BHRT-a u kojem se traži da se u skladu sa zakonom konsultuje sindikat prije donošenja ovakvih akata. Jedan dio traženih izmjena je prihvaćen od strane UO i generalnog direktora BHRT-a.

Sindikata je osudio privođenje kolege Vlade Šuška pri izvršavanju njegovog radnog zadatka.

Sindikata je obezbjedio promo materijal za svakog člana sindikata i organizovao priredbu za djecu sa podjelom paketića za svu djecu članova sindikata uzrasta do 10 godina.

UO Samostalnog sindikata radnika u BHRT-u je donio zaključak da se u januaru organizuje tradicionalni ispraćaj penzionera-članova Sindikata koji su penzionisani zaključno sa 31.12.2018.godine.

Samostalni sindikat radnika u BHRT-u je u 2018-toj godini na osnovu Pravilnika o dodjeli finansijske pomoći članovima sindikata izdvojio ukupno 15.150 KM, a svakom članu Sindikata za rođenje djeteta je izdvojeno po 200 KM.

Tokom godine preko svojih članova, kroz rad povjereništava Podružnica, oglašavanjem u RTV Domu, te putem e-mailova, web stranice, facebook-a i vibera, Sindikat je nastojao informisati članstvo o svim svojim aktivnostima.

UO je nastavio obezbjeđivati razne pogodnosti za članove Sindikata, potpisivanjem ugovora u kojima su definisani određeni popusti, odnosno povoljnosti pri plaćanju usluga za naše članove.

UPRAVNI ODBOR  
SAMOSTALNOG SINDIKATA RADNIKA U BHRT-u